

- राजस्थान हाई कोर्ट मांय चाल रह्या मामला बेगा निपटावण सारु अब हर महीना दो थावर ने नियमित सुणवाई रो फैसलो।
- राज्य मांय जीएसटी विभाग 110 कारोबारी ठिकाणां ऊं 200 करोड़ रुप्या ऊं बत्ती रकम री कर चोरी पकड़ी।
- जोधपुर रा आयुर्वेद विश्वविद्यालय री ओर ऊं अब यू.के. अर जर्मनी रा संस्थानां मांय आयुर्वेदिक डिग्री अर डिप्लोमा रा कोर्स चलाया जावेला।
- प्रदेश मांय सिंयाळू साखां री लक्ष्य रे मुकाबले 93 फीसदी ऊं बत्ती बुवाई व्ही।

000

राजस्थान हाईकोर्ट मांय चाल रह्या मामलां रा बेगा निपटारा सारु हाईकोर्ट कामकाज रा दिन बधावण रो फैसलो कीनो है। राजस्थान हाईकोर्ट री पूरी पीठ री कार्यवाहक मुख्य न्यायाधीश न्यायमूर्ति संजीव प्रकाश शर्मा री सदरत मांय जैसलमेर मांय व्ही मीटिंग मांय ओ फैसलो करी ज्यो। फैसला रे मुजब हाईकोर्ट मांय सालाना 210 ऊं बधा र 230 दिन काम कर्यो जावेला। सुप्रीम कोर्ट रा मुख्य न्यायाधीश न्यायमूर्ति सूर्यकांत री पहल परां अब हर महीना रा दो थावर ने ई हाईकोर्ट मांय नियमित कामकाज व्हेला। ई सागे ई राजस्थान हाईकोर्ट काम रा दिन बधावण वाळो देश रो पहलो हाईकोर्ट बण ग्यो है। मीटिंग मांय जयपुर अर जोधपुर मांय मजिस्ट्रेट लेवल माथे एक-एक सायंकालीन न्यायालय ई पायलट प्रोजेक्ट रा तौर ऊं सरु करण रो फैसलो करी ज्यो।

000

राज्य मांय आज प्लाईवुड, भंगार, टाइल्स अर मकान बणावण सरीखा खास हलकां री 110 कारोबारी ठौडां ऊं 200 करोड़ रुप्या ऊं बत्ती रकम री कर चोरी पकड़ी ज्यी। स्टेट जीएसटी ऊं मिली जाणकारी रे मुजब जाँच रे दौरान फर्जी बिल अर आपत्ति लायक कागजात मिल्या। केई कारोबारी कर चोरी मानता थकां करीब 10 करोड़ रुप्या री रकम जमा करायी है।

000

राज्य री मौजूदा सरकार रा कामकाज रा दो साल पूरा व्हेवण रा सिलसिला मांय प्रदेश मांय न्यारा-न्यारा कार्यक्रम राख्या जा रह्या है। जयपुर मांय अमर जवान ज्योति माथे राख्यी ज्या सड़क सुरक्षा अभियान रा राज्य स्तर रा जळसा मांय मुख्यमंत्री भजनलाल शर्मा ई शिरकत कीनी। वे सड़क हादसां रे कारण जख्मी व्हेवण वाळां री जान बचावण वाळा पांच जणा रो मान कीनो। ई मौके मौजूद जनता ने मुख्यमंत्री सड़क सुरक्षा री शपथ दिरायी अर यातायात नियमां री पालना री अरज कीनी। वे जनता मांय जाग जगावण वाळा रथ अर 500 ऑटोरिक्षा ने हरी झण्डी बता र रवाना कीना। मुख्यमंत्री पोस्टर रो विमोचन कीनो अर दिव्यांगजन ने हेलमेट बांट्या। अजमेर मांय राख्यी ज्या कार्यक्रम मांय विधानसभा अध्यक्ष वासुदेव देवनानी, उपमुख्यमंत्री दिया कुमारी अर केई आला अहलकार शामिल व्ह्या। उपमुख्यमंत्री खबरनवीसां सागे बातचीत करता थकां कह्यो के राज्य री भजन लाल सरकार दो साल रा कामकाज मांय सगळी योजनावां ने असरदार तरीका ऊं लागू कीनी है।

000

भारतीय जनता पार्टी रा प्रदेश अध्यक्ष मदन राठौड़ कह्यो है के राज्य मांय चाल रह्या विकास रा काम जनता ने भा रह्या है। वे राज्य री मौजूदा सरकार रो दो साल रो कामकाज पूरो व्हेवण रा सिलसिला मांय आज जयपुर मांय खबरनवीसां सागे बातचीत कर रह्या हा। श्री राठौड़ कह्यो के राज्य बिजली रा हलका मांय खुद रे पाण ऊबो व्हे रह्यो है, नुवी ताप अर परमाणु बिजली परियोजनावां सरु करीजी है अर किसानां ने दिन मांय ई बिजली मिल रही है। राठौड़ कह्यो के पाणी री पूर्ति सारु मध्यप्रदेश अर हरियाणा सागे रुक्योडा करार ऊं जुड्या काम व्ह्या है अर माही बंधा ऊं गुजरात ने दियो जा रह्यो वां रा हिस्सा रो पाणी अबे प्रदेश ने मिलेला। वे सड़कां बेहतर बणावण, 'राइजिंग राजस्थान' रा तैत 8 लाख करोड़ रुप्या रा निवेश रा काम सरु करण अर नौजवानां ने 1 लाख ऊं बत्ती सरकारी नौकरियां देवण ने सरकार री उपलब्धियां बतायी।

प्रदेश भाजपा अध्यक्ष कांग्रेस माथे नकारात्मक सियासत करण रो आरोप मांड्यो।

000

जोधपुर रा आयुर्वेद विश्वविद्यालय री ओर ऊं अब दिसावर मांय ई आयुर्वेद डिग्री अर डिप्लोमा रा कोर्स चलाया जावेला। ई सारु विश्वविद्यालय ने राज्य अर केंद्र सरकार ऊं मंजूरी मिल ग्यी है। अ कोर्स चलावण सारु विश्वविद्यालय यू.के. अर जर्मनी समेत केई परदेशी संस्थावां सागे करार कीना है। ई रा तैत ऑनलाइन नाडी परीक्षण सर्टिफिकेट कोर्स, न्यूट्रा स्यूटिकल अर सौंदर्य प्रसाधन सरीखा मुद्दां माथे कोर्स चलाया जावेला। ई सागे ई विश्वविद्यालय रा न्यारा-न्यारा महकमां मांय बुजुर्गां देखभाल ऊं जुड्या नुवा कोर्स चलाया जावेला, ज्यां मांय दसवीं पास लोग ई दाखिल ले सकेला।

000

प्रदेश मांय ई दफा सिंयाळू साखां री बुवाई लक्ष्य रे मुकाबले 93 फीसदी ऊं बत्ती व्हे चुकी है। ई दफा 1 करोड़ 20 लाख हेक्टेयर हलका मांय साखां री बुआई करी जावणी ही, जदके हाल तांई 1 करोड़ 12 लाख हेक्टेयर हलका मांय बुवाई करी ज्यी है। ई सीजन मांय गेंहू री बुआई 90 फीसदी ऊं बत्ती, जदके सरसों री बुआई लक्ष्य रे मुकाबले 94 फीसदी ऊं बत्ती व्हे चुकी है।

000

देश साल 2001 मांय आज ही री तारीख ने संसद माथे व्ह्या आतंकी हमला ने नाकाम करण री कोशिश मांय जान री बाजी लगा देवण वाळां ने आज सिरधाभाव सागे याद कर रह्यो है। उपराष्ट्रपति सी.पी. राधाकृष्णन, प्रधानमंत्री नरेन्द्र मोदी अर केंद्रीय मंत्री पीयूष गोयल, जितेंद्र सिंह, किरेन रिजिजू अर अर्जुन राम मेघवाल संसद भवन मांय फूल चढा र शहीदां ने याद कीना। लोकसभा मांय विपख रा नेता राहुल गांधी, कांग्रेस री आला नेता सोनिया गांधी अर दूजा सांसद ई शहीदां ने याद कीना। ई मौके राष्ट्रपति द्रौपदी मुर्मू कह्यो के देश वां नायकां री हिम्मत, वीरता अर बलिदान ने नमन करे है, ज्यां री कर्तव्य निष्ठा देश री राष्ट्रीय भावना ने लगातार दिशा देवे है। राष्ट्रपति आतंकवाद रा हर रूप रे खिलाफ भारत री लड़ाई रो संकल्प दोहरायो। प्रधानमंत्री नरेन्द्र मोदी कह्यो के देश आं शहीदां रा बलिदान ने हमेशा याद राखेला। वे भीषण खतरा बीचे शहीदां री हिम्मत, सावचेती अर कर्तव्यनिष्ठा री सराहवणा कीनी।

000

केंद्रीय संस्कृति अर पर्यटन मंत्री गजेंद्र सिंह शेखावत कह्यो है के केन्द्र सरकार रा इंफ्रास्ट्रक्चर विकास अभियान ऊं सड़क, हाईवे, उड्डयन अर वॉटरवे ने पूरो बधावो मिल रह्यो है, जिण ऊं भारत री दुनिया मांय छवि सुधरी है अर सैर-सपाटा रो हलका मांय ध्यानजोग बधोतरी व्ही है। श्री शेखावत आज जोधपुर मांय खबरनवीसां सागे बातचीत कर रह्या हा। वे कुछ लोगां कानी ऊं देश रा एका ने सियायी फायदा ऊं जोड़बा ने दुर्भाग्यपूर्ण बतायो।

000

कोटा री रेलवे वर्कशॉप तेल री चोरी अर लीकेज रोकण सारू मॉडिफाइड बीटीपीएन टैंकर बणाया है। आं ने भरण री ठोड़ खास ताळा अर लॉकिंग बोल्ट लगायी ज्या है। वर्कशॉप मांय ऐडा दो रैक बणायी ज्या है ज्यां मांय ऊं एक रो कामयाबी सागे टेस्ट रन पूरो कर लियो ज्यो है। कोटा रेल मंडल री सलाहकार समिति रा सदस्य धीरज गुप्ता बतायो के आ तकनीक पूरा देश सारू नवाचार है।

000

विधानसभा मांय सोमवार ने सरकारी स्कूलां रा विद्यार्थियां री युवा संसद राख्यी जावेला। स्पीकर वासुदेव देवनानी इण रो उद्घाटन करेला। इण मांय **हमारा भविष्य-हमारा निर्णय, किशोर-किशोरियों के सशक्त भविष्य के लिए सुदृढ़ मानसिक स्वास्थ्य अर उचित करियर मार्गदर्शन की आवश्यकता** मुद्दां माथे चर्चा करी जावेला। युवा संसद मांय भाग लेवण सारू प्रदेश रा 41 जिलां ऊं 164 विद्यार्थी चुणी ज्या है।

000